

YANGI O‘ZBEKISTON

Ijtimoiy-siyosiy gazeta

№ 107 (1168), 2024-yil 1-iyun, shanba



www.yuz.uz



yuz.uznews



yuz_official



yuz.uz_news



yuz



VILOYATDA AMALGA OSHIRILAYOTGAN ZAMONAVIY LOYIHALAR AHOLINING QALBIGA YORUG‘LIK, ISHONCH VA UMID OLIB KIRADI

Prezident Shavkat Mirziyoyev 31-may kuni iqtisodiyotning turli tarmoqlarida amalga oshirilayotgan loyihalarni ko‘zdan kechirish, yirik obyektlar qurilishiga start berish, mahallalar hayoti bilan tanishish uchun Buxoro viloyatiga tashrif buyurdi.



Tashrif xayrli amaldan — Bahouddin Naqshband maqbarasi ziyoratidan boshlandi. Qur‘on oyatlari tilovat qilindi, xalqimizga tinchlik-farovonlik tilab duo o‘qildi.

Davlatimiz rahbari tashabbusi bilan majmua yanada obod qilinib, tarixiy asiyat tiklanmoqda. Ziyorat chog‘ida ushbu ishlar ko‘zdan kechirildi.

Avvalo, To‘qi miyona darvozasidan boruvchi tarixiy yo‘lak tiklandi. Endi ziyoratchilar Bahouddin Naqshband maqbarasiga sunnatga muvofiq qibla tarafdin yurib boradi.

— Yuz yil vayron bo‘lib yotgan bu darvozani tiklaganimiz — o‘zlikni anglash, tarixga hurmatimiz ifodasi, — dedi Shavkat Mirziyoyev. — Endi bu yerdagi har bir obidaga, xonlar daxmalariga bitiklar yozib qo‘yish kerak. Ziyoratga kelganlar qadam-baqadam tarixni o‘rganib, ma‘naviy ruh olib o‘tsin.

To‘qi miyona darvozasining ikki yoni boqqa aylantirilgan. Muzei va tahoratxona barpo etilgan. Yo‘qolib borayotgan Doniyolbiy madrasasi tiklanmoqda.

Olimlar bilan suhbatda Bahouddin Naqshband merosini chuqur o‘rganish haqida fikr almashildi. Chet davlatlardan manbalarni olib kelish, ilmiy izlanishlarni qo‘llab-quvvatlash, muzeyni Imom Buxoriy

majmuasidagidek mazmunan boyitish zarurligi ta‘kidlandi. Shuningdek, ziyoratchilar, jumladan, xorijiy turistlar uchun qulayliklarni kengaytirish, qishga ham, yozga ham mos sharoitlar yaratish bo‘yicha ko‘rsatmalar berildi. Mutasaddilarga shularni qamrab olgan holda, olimlarning takliflari asosida qaror ishlab chiqish topshirildi.

Prezident Shavkat Mirziyoyevning Buxoro viloyatiga tashrifi arafasida “Qorako‘l” erkin iqtisodiy zonasida “Enpipe” korxonasi ishga tushirildi.

Umumiy qiymati 58 million dollar bo‘lgan loyiha to‘liq xorijiy investitsiya hisobidan amalga oshirildi. Xitoy, Turkiya, Niderlandiya va Ispaniyadan zamonaviy uskunalar keltirib o‘rnatilib, yiliga 300 ming tonna metall quvurlar ishlab chiqarish tashkil etildi.

To‘g‘ri chokli uslubda tayyorlanuvchi bu quvurlar yuqori bosimga va tashqi ta‘sirga chidamliligi bilan ajralib turadi. Ilgari bunday mahsulotlar, asosan, xorijdan olib kelinar edi. Tashishda quvurlar hajmi ko‘p joy egallagan uchun narxi ham qimmatga aylanardi.

Endi turli qalinlikdagi metallar list shaklida olib kelinib, shu yerdan tayyorlanmoqda. Buning samarasida tannarx 25 foiz arzonlashdi.

Gaz-kimyoy va tog‘-kon sanoati, qurilish va boshqa sohalarida bunday chidamli quvurlarga talab yuqori. Xususan, shu yerdan qurilayotgan MTO gaz-kimyoy majmuasida ham shundan foydalaniladi.

Korxonada 400 dan ortiq kishi doimiy ish bilan ta‘minlandi.

Davlatimiz rahbariga korxonaning rejalari, navbatdagi bosqichlar haqida ma‘lumot berildi.

Ushbu loyiha ikkinchi bosqichini amalga oshirish uchun ishlar boshlab yuborilgan. Unda bosimga bardoshli turli hajmdagi rezervuarlar ishlab chiqariladi. Yana 500 ta yangi ish o‘mi yaratiladi.

Loyiha to‘liq quvvat bilan ishlansa, 121 million dollarlik mahsulotlar tayyorlash imkoniyati tug‘iladi. Korxonaning eksport salohiyati yanada ortadi.

Davlatimiz rahbari shu yerdan ommaviy axborot vositalari vakillari bilan suhbatlashdi.

— Bugun Buxoroga kelishimizdan maqsad 2 milliondan ziyod aholining turmushini yaxshilash, daromad manbai yaratish, kambag‘allikni qisqartirish. Viloyatning ko‘p joyida ekin ekish uchun yerning sho‘rini yuvish kerak. Shuning uchun biz ko‘proq sanoatga e‘tibor beryapmiz. Mana shu zavodni ham nima uchun qurdik? Bunday quvurlarni olib kelish

uchun ko‘p pulimiz yo‘lga ketardi. Bugun yana yangi inshootlar qurilishini boshlaymiz. Ularning atrofida bir nechta korxonalar, ish o‘rinlari paydo bo‘ladi. Pirovard natijada odamlarning uyiga yorug‘lik, ishonch va umid kiradi. Ana shu umid bizlarni birlashtiradi, — dedi Prezident.

Viloyat sanoatida “Qorako‘l” erkin iqtisodiy zonasida bir zamin bo‘ladi. Ushbu hudud O‘zbekiston Respublikasi Prezidentining 2021-yil 13-avgustdagi tegishli qaroriga asosan tashkil etilgan. Uning umumiy maydoni 566 gektar bo‘lib, 5 ta yirik loyiha joylashtirilgan. Ular bosqichma-bosqich amalga oshirilib, yakunda uch mingga yaqin ish o‘mi yaratilishi mo‘ljallangan.

Davlatimiz rahbari Buxoro viloyatining sanoat ko‘rgazmasi va yangi investitsiya loyihalari bilan tanishdi.

Sanoat tarmoqlarida ishlab chiqarilayotgan mahsulotlar hamda rejalashtirilgan loyihalar hamohang taqdimot qilindi.

Ko‘rgazmada istish tizimlari uchun katta va kichik qozonlar, og‘ir va yengil sanoat uchun detallar, turli o‘lcham va quvvatdagi sovitkichlar, elektrotexnika uskunalar, motosikllar ko‘zdan kechirildi. Shuningdek, davlat xaridlarini tartibga solish mexanizmi namoyish etildi.

Oxirgi yetti yilda viloyatga qariyb 4 milliard dollarlik investitsiyalar jalb etilgan. Ularning natijasida 90 mingta ish o‘rni va 1 milliard 800 million dollarlik eksport imkoniyati yaratilgan. Joriy yil viloyatda 1 milliard 300 million dollarlik 607 ta loyiha amalga oshirilmog‘da.

Buxoro viloyatida xorijiy investor va mahalliy tadbirkorlar tomonidan umumiy qiymati 14 milliard dollarlik 80 ta loyiha shakllantirilgan. Shundan 4 milliard dollarlik 14 ta loyiha investorlar va tarmoq rahbarlari birgalikda taqdimot qildi.

Loyihalarga Xitoy, Rossiya, Turkiya, Germaniya, Saudiya Arabistoni, Hindiston, Malayziya, Janubiy Koreya kabi mamlakatlar kompaniyalari investitsiya kiritmoqda. Loyihalar qurilish materiallari, elektr texnikasi, kimyo, to‘qimachilik, oziq-ovqat, farmatsevtika, tibbiyot, konchilik, baliqchilik va boshqa tarmoqlarni qamrab olgan.

Masalan, Xitoy bilan hamkorlikda G‘ijduvon tumanida 600 MVtga teng shamol elektr stansiyasini qurish, malayziyalik investor tomonidan Peshku tumanida grafit konini o‘zlashtirish va elektroskuterlar uchun akkumulyatorlar ishlab chiqarishni tashkil etish, eronlik investorlar tomonidan Buxoro tumanida

kimyo klasterini tashkil etish loyihalari amalga oshirish rejalashtirilgan.

Mazkur 80 ta loyiha ishga tushirilishi natijasida 22 ming 200 dan ziyod aholi ish bilan ta‘minlanadi.

Prezidentimiz qo‘shilgan qiymatli mahsulotlarni va mahalliy lashtirishni ko‘paytirish, xizmatlarni rivojlantirish bo‘yicha qo‘shimcha ko‘rsatmalar berdi.

Davlatimiz rahbari Qorako‘l tumanida jamoatchilik vakillari bilan suhbatlashdi.

Buxorolik nuroniyalar ijtimoiy davlat tamoyili asosida joylarda inson manfaatlari ta‘minlanayotganini aytdi. Zamonaviy maktab va institutlar tashkil etilib, bolalar ta‘lim-tarbiyasiga imkoniyatlar kengaymoqda. Aholining salomatligi doimiy nazoratda.

Iqtisodiy-ijtimoiy dasturlar natijasida tumanlarga sanoat kirib boryapti, mahallalar obod bo‘lmoqda. Tadbirkorlik va o‘zini o‘zi band qilishga keng yo‘l ochilgan.

Sayxunobod tajribasi asosida iqtisodiy kompleks tashkilotlari kambag‘al oilalar bilan manzilli ishlab, ularning daromad topishiga ko‘maklashmoqda. Tomorqalardan samarali foydalanilyapti.

▶ Davomi 2-betda

Jadidlar merosi



“OTA YURTIMGAMENING
KO‘ZLARIM BILAN BOQ, O‘G‘LIM!”
GERMANIYADAN YO‘LLANGAN 2
TABRIK XATI

1-iyun — Xalqaro bolalarini himoya qilish kuni

UCHINCHI RENESSANS POYDEVORINING MUSTAHKAM ASOSI

O‘zbekistonning bolalar huquq va manfaatlarini ta‘minlash siyosatiga bir nazar

Bolalik inson hayotining beg‘ubor davri, eng ajoyib va go‘zal pallasi, shaxs kamolotidagi muhim bosqich. Aynan mana shu davrda bo‘lg‘usi shaxs jamiyat bilan to‘laonli munosabat o‘rnatishga tayyorgarlik ko‘radi. Bir so‘z bilan aytganda, bolalarni har tomonlama sog‘lom, bilimli avlod sifatida kamolga yetkazish buyuk maqsadlar, tarixiy taraqqiyotga erishishni ko‘zlagan har qanday jamiyatda davlat siyosatining eng ustuvor vazifasiga aylanadi.

Mamlakatimizda ushbu yo‘nalishda qilingan ishlar e‘tiborga molik. Birgina maktabgacha ta‘lim yo‘nalishini olsak, oxirgi yetti yilda bog‘chalarga qamrov 27 foizdan 74 foizga yetkazildi. Yangi maktablar qurilishi hisobiga qo‘shimcha 700 mingta o‘quvchi

o‘mi yaratildi. Prezident maktablari ochildi, ixtisoslashtirilgan maktablar ko‘paymoqda. Shu tariqa Uchinchi Rennessans poydevorini yaratishdek buyuk maqsad yo‘lida mustahkam asos yaratilmog‘da.

▶ Davomi 3-betda



